

AKUERDO DI
PASSANGRAHAN

PA FORMASHON DI UN GOBIÈRNU PA
TERITORIO INSULAR DI BONAIRE

Bonaire, 12 yüni 2009

AKUERDO DI PASSANGRAHAN

PA FORMASHON DI UN GOBIÈRNU PA

TERITORIO INSULAR DI BONAIRE

Suskritonan,

J.E. (Jopie) Abraham, representando komo lider e frakshon di Aliansa Demokrátiko Boneriano ku kuater (4) asiento den Konseho Insular di Boneiru (yamá: "ADB") i

mr. Anthony T.C. Nicolaas, miembro independiente di Konseho Insular di Boneiru (despues yamá: "Nicolaas");

huntu representando mayoria apsoluto di Konseho Insular di teritorio insular di Boneiru;

pa medio di esaki ta deklará di a yega na un akuerdo pa formashon di un gobièrnu insular pa Boneiru pa e sobrá periodo di gobernashon insular te ku medio aña 2011;

- basá riba rèspèt mutuo, konfiansa i independensia di kada un di e dos (2) frakshonan enbolbí i
- teniendo kuenta ku e aporte na e akuerdo aki di kada un di e dos (2) frakshonan menshoná.

A.D.B. i Nicolaas ta yega na e siguiente akuerdo pa formashon di un gobièrnu nobo pa teritorio insular di Boneiru:

ADB i Nicolaas ta kumbiní ku komo mayoria di Konseho Insular nan lo enkargá Kolegio Ehekutivo di teritorio insular di Boneiru pa hasi lo máksimo esfuerso pa atendé ku nesesidat i interesnan di nos pueblo den un forma digno i korekto, dunando den henter e trayektorio partisipashon amplio na tur sektor di nos komunidad den asuntunan ku ta toka nan i nos komunidad.

Struktura Estatal

E gobièrnu insular, frakshon di ADB i miembro independiente Nicolaas lo duna prioridat máksimo na e proseso di struktura estatal, ku partisipashon real di tur gremio den un forma digno i representativo. Meta ta pa logra un konstelashon estatal nobo pa Boneiru ku ta duna, mantené, perseverá i promové e norma i balornan di nos kultura (fundá di akuerdo ku e prinsipionan di Dios) i rèspèt propio di nos poblashon, ku oportunitatnan amplio pa desaroyo balansá i lo máksimo bienestar pa tur miembronan di nos komunitat. Lo traha i negoshá a base di rèspèt mutuo ku Hulanda i demas partnernan den Reino Hulandes pa yega na derechonan igual den e sentido mas amplio di palabra pa tur siudadano.

Lo someté kontenido i resultado final pa e struktura estatal nobo na konsulta popular.

Asuntunan Gubernamental

Den asuntunan gubernamental lo sòru pa hiba un maneho presupuestario di finansa públiko disipliná, sano i balansá, miéntras ku lo stimulá i fortalecé organisashon di e aparato gubernamental i posishon legal di empleadonan públiko ku muestra di rèspèt i dignidat. Den esaki lo duna e promé opshon pa nos propio empleadonan públiko risibí oportunitat real i hustu pa formashon mas avansá pa mehorá konosementu den nan trabou i alsa kalidat di nan funshonamentu.

Simultáneamente ku e proseso estatal lo duna atenshon amplio na:

- nos desaroyo ekonómiko i laboral;
- hubentut i famia;
- bibienda popular;
- salubridat públiko i kuido médiko adekuá;
- derecho- i garantianan sosial i di siguridat;

- enseñansa i formashon;
- transporte públiko i komunikashon
- kultura i deporte;
- planifikashon físiko;
- nos naturalesa i medio ambiente

i tur e vários empresa i otro responsabilidatnan gubernamental.

Por lo demas ADB i Nicolaas ta kumbiní ku:

1. Dentro di un periodo mas korto posibel – konsiderando e akontesimentunan polítiko, estatal i ekonómiko di último tempu – lo publiká un programa di gobernashon i un plan di akshon;
2. E gobièrnu lo konsistí di kuater (4) diputado, di kual dos (2) lo ta miembro di Konseho Insular i dos (2) lo no ta miembro di Konseho Insular (“buiten de raad”);
3. ADB lo apuntá tres diputado, di kual dos (2) lo ta miembro di raad i unu lo no ta miembro di raad, miéntras ku Nicolaas lo apuntá un (1) diputado ku lo no ta miembro di raad;
4. E repartishon di portafolionan lo bai di akuerdo ku palabrashon hasí i lo keda formalisá den Kolegio Ehekutivo, despues di elekshon di e kuater (4) diputadonan nobo den reunion públiko di Konseho Insular riba dia 15 di yüni 2009, kual palabrashon i desishon di repartishon di portafolionan mester konsiderá parti integral di e konvenio aki;
5. E lider di frakshon di ADB i e miembro independiente sr. Anthony Nicolaas lo atendé i koordiná tur asuntunan importante i klave ku ta toka gobernashon di teritorio insular i ehekushon di e akuerdo aki;

6. Den repartishon di funshonnan den organisashonnan di gobièrnu òf organisashonnan den kual gobièrnu ta partisipá, lo tene kuenta ku ekivalensia di e dos partnernan ku ta forma parti di e akuerdo aki.

Suskritonan ta komprometé nan mes pa kumpli ku e palabrashonnan aki den buena fe i ta dediká tur nan esfuerso pa Boneiru i su pueblo tin un gobièrnu hustu, íntegro i transparente ku ta respetá i rekonosé derechonan fundamental di kada suidadano, sin ningun distinshon.

Komo tal suskritonan ta firma e akuerdo aki den duplo, awe, djabièrnè 12 di yüni 2009 den Pasanggrahan, Kralendijk, Bonaire.

J.E. (Jopie) Abraham
Lider di frakshon di Aliansa
Demokrátiko Boneriano den
Konseho Insular di Boneiru

mr. Anthony T.C. Nicolaas
Miembro independiente den
Konseho Insular di Boneiru